

Il cumbat pro u contra l'atom cuntinua

Suenter il na a l'iniziativa verda stat la strategia d'energia sin ballantscha

■ (anr/vi) Il pievel na vul betg sortir uschè svelt da l'energia nucleara. Suenter il «na» dad ier a l'iniziativa verda cumenza gia il proxim cumbat: pro u contra la «strategia d'energia 2050». Strusch ch'ils resultats da votaziun èn stads enconuschents ier èn sa posiziunads ils adversaris – per part er exponents da la pld. La dumonda cardinala è uss: Co èsi d'interpretar la refusa dad ier? Ha il pievel mo ditg na ad ina sortida svelta e preferescha sco alternativa la strategia d'energia che lubescha a las ovras nuclearas da restar en funcziun uschè ditg sco la segirtad è garantida? U n'ha il giavisch per sortir da l'energia nucleara – tshintg onns suenter Fukushima – nagina prioritad pli?

Da preschent rimna la pps sottascriviens cunter la strategia d'energia che cuntogna sper mesiras da promover energias regenerablas er il scumond da novas ovras atomaras. Gia l'onn proxim po il pievel pia puspè s'exprimer davart l'avegnir da l'atom en Svizra.

In'acceptanza vasta per la sortida?

Era sch'ils verds han pers discurren els d'in bun resultat e pretendan reglas claras co tschentar giu las ovras atomaras. Che tants Svizzers hajan ditg gea a lur iniziativa mussia tuttina in'acceptanza vasta per l'abandon da l'energia atomara, di cussegliera naziunala *Regula Rytz* (verds/BE) sin radio SRF. Il pievel na veglia naginas novas ovras pli. Perquai stoppian ins sviluppar e rinforzar las energias regenerablas. Impurtant saja da stgaffir uss reglas co che las ovras sajan da tschentar giu. En quest connex stoppian ins rinforzar la surveglianza atomara (Ensi) per che lezza tiria ad uras «il stecker» en la fasa privlusa da la fin da las ovras vegliandras.

«In ballun da subvenziuns»

«La gliעד na vul savair nagut d'ina sortida atomara», di *Christian Wasserfallen*



Il suveran svizzer vul prender temp da sortir da l'energia atomara.

KEYSTONE

(pld/BE) al radio. Il «na» a l'iniziativa verda dat andit al cusseglier naziunal da batter vinavant per ovras atomaras ed encunter la strategia d'energia. Lezza saja nunliberala e na dettia nagina risposta areguard la segirezza da providiment. La strategia d'energia saja mo in ballun da subvenziuns. Che la Svizra na possedia oz betg dapli energias regenerablas saja cunzunt era la culpa dals verds che hajan onns a la lunga cumbattì novas ovras idraulicas sco per exempel quella sin il Grimsel.

Romandia, Vuorz, Cuira dian «gea»

La votaziun dad ier è stada gia la settavla davart l'energia atomara. L'emprima iniziativa che ha pretendì il 1979 ch'il pievel pertutgà dastgia decider davart l'ovra planisada a Kaiseraugst. Il suveran svizzer ha adina votà a favur da l'energia nucleara. Danor la Romandia: Lezza ha trais giadas beneventà ina sortida. Il Tessin ha perfin quatter giadas ditg gea.

Il Grischun suonda en quest regard

plitost la Svizra tudestga. Ils Grischuns han refusà ier l'iniziativa verda cun 26 069 cunter 33 110 vuschs. La tenuta dals Grischuns n'è dentant betg omogenea: Ils votants da Cuira han per exempel exprimi cun 50,62 pertschient in stgars gea. Circa in tozzel vischnancas han ditg gea cun procentualas fin 60 pertschient, Vuorz e Verdabbio cun procentualas anc pli autas.

Las refusas pli datschertas derivan da pliras vischnancas sursilvanas e da l'Engiadin'Ota.